

Vedtekter for gravplassane i Etne kommune



Vedtekter for gravplassane i Etne kommune

Jfr. Lov av 7.juni 1996 nr. 32 om gravplassar, kremasjon og gravferd (gravferdslova) §21(1)

Vedteke i Etne kyrkjelege fellesråd dato 19.mars 2019

Godkjent av Bjørgvin bispedømmeråd 20.mai 2019

Trer i kraft frå 1.juni 2019

§1 Forvaltning

Gravplassane i Etne kommune er underlagt Etne kyrkjelege fellesråd sitt administrasjons og myndigheits område.

§2 Definisjonar

Gravplassforvaltning: Etne kyrkjelege fellesråd under utøving av sitt forvaltningsansvar for gravplassane i Etne kommune, jf. Gravferdslova med forskrifter.

Fri grav: Tildelt grav til innbyggjarane i kommunen, som det ikkje vert betalt festeavgift for i fredingstida.

Festegrav: Grav som er festa mot betaling av avgift.

Festa gravstad: Fleire kistegraver som er festa saman

Urnegrav: Grav berre for urner, med plass til fire urner jf. Gravferdsforskrifta §14. Dette gjeld ikkje namna minnelund der ein med urnegrav meiner grav med plass til ei urne.

Kistegrav: Grav som i varetek forskrifta sine krav til storleik for gravlegging av kister. Det kan også gravleggast urner.

Fredingstid: Tidsrom frå siste gravlegging til grava kan brukast om att.

Festetid: Tida det er avtalt å festa ei grav for.

Ansvarleg: Den som står som ansvarleg for ei fri grav.

Festar: Den som står som part i festeavtale.

§3 Gravplasstillhøyrse

Døde personar i kommunen kan gravleggjast på den gravplassen i kommunen som dei måtte ønskje. Dei har rett til fri grav så sant grava vert tilvist.

Dette gjeld òg om den døde på grunn av sjukdom eller alderdom har budd i eit anna sokn eller i ei anna kommune mot slutten av livet.

Døde personar frå andre kommunar kan gravleggjast i kommunen mot at kostnadane ved gravferda og avgift som ved feste av grav vert betalt.

§ 4 Fredningstid og festetid

Fredningstid for kistegrav er 20 år. Fredningstid for urnegrav er 20 år. Festetid er 10 år.

Gravplassforvaltninga kan vedta lengre fredningstid for enkelte graver.

§ 5 Feste av grav

Når kistegrav vert teke i bruk, er det høve til å feste ei grav ved sida av, og etter søknad til Etne kyrkjeleg fellesråd; for ei ekstra grav i tillegg når det er bruk for det. Desse gravene utgjer då ein gravstad.

Ved bruk av særskild urnegrav kan det ikkje festast grav ved sida av.

Når festetida er ute, kan gravstaden festast for nye 10 år. Når det er gått 60 år etter siste gravlegging, kan festet ikkje fornyast utan særskilt samtykkje frå kyrkjeleg fellesråd. I god tid før festetida er ute skal festaren varslast. Er festet ikkje fornya innan 6 månader, fell gravstaden tilbake til gravplassen. Innbetalt festeavgift vert berre betalt tilbake dersom tilbakebetaling føl av bindande rettsreglar eller det føreligg særskilde grunnar.

Ingen kan gravleggast i festa gravstad utan samtykkje frå festaren. Dersom festaren sitt samtykkje ikkje kan innhentast, kan kyrkjeleg fellesråd avgjere spørsmålet om gravlegging. Festaren pliktar å melde adresseendring.

§ 6 Grav og gravminne

Ved opning av grav kan jord leggjast på omkring-liggjande graver, og gravutstyr flyttast mellombels. Gravplassforvaltninga sørgjer for istandsetjing igjen, og vil syta for planering og tilsåing av grava etter gravlegging. Montering av gravminne kan først skje etter at kyrkjeleg fellesråd har godkjent gravminnet og merka staden der det skal stå. Gravminne skal ikkje setjast opp tidlegare enn 6 månader etter gravlegging av kiste. I mellomtida set tilsette på gravplassen opp eit merke med namnet til den døde. Gravminne på urnegrav kan setjast opp med ein gong etter urnenedsetting. På ny festa gravstad vert gravminnet plassert i bakkant av den grava som først er tatt i bruk. Etter at grav nummer to er tatt i bruk, skal det berre brukast eitt gravminne og det skal stå på den første grava som er tatt i bruk.

Gravminne, fastmonterte dekorgjenstandar, namneplater, fundament eller sokkel vert rekna som del av monumentet og skal godkjennast av kyrkjeleg fellesråd.

§ 7 Bed, planter og utstyr på grava

Framfor gravminnet er det høve til å opparbeide eit bed i høgde med bakken rundt. Det må ikkje vere breiare enn breidda på gravminnet, men kan i alle høve vere opp til 60 cm breitt. Det kan ikkje stikke lenger fram enn 60 cm, målt frå bakkekanten av gravminnet. Det kan ikkje plantast vokstrar som er høgare enn gravminnet eller går ut over bedet.

Lause dekorgjenstandar, gravutstyr og planter er den ansvarlege /festaren sitt ansvar og må ikkje kunna virka støytande overfor andre besøkjande eller væra usømmelege. Dekorgjenstandar og planter kan ikkje vera høgare eller breiare enn gravminnet og plantefeltet framfor. Desse må ikkje vera til hinder eller fare for drifta av gravplassen.

Det er høve til å tenna stearinlys og oljelampe på grava så lenge dette er innanfor gjeldande reglar om brannvern. Lause dekorting skal fjernast etter bruk.

Det er høve til å ramme inn bedet med ein delt steinskant eller bed-plate som fluktar med terrenget rundt. Bedplate og fundament for gravminne skal ikkje henge saman. Fellesrådet tek ikkje ansvar for skader på slik steinskant eller plate som vert påført under klipping av gravplassen.

Dersom det ikkje er aktuelt å ha bed, skal det vere grasbakke på alle sider av gravminnet.

Det er ikkje aktuelt å ramma inn grava med hekk eller døde materiale.

Planter, kransar og liknande tilfang som vert nytta ved gravferd eller ved pynting av grav og som endar som avfall, skal vere heilt kompostèrbart.

§ 8 Stell av grav

Den som er ansvarleg for frigrav eller er gravfestar har rett og plikt til å stelle den grava han har ansvaret for. Bed som ikkje vert tilplanta og stelt skal såast til av den ansvarlege eller av gravplassforvaltninga.

Ansvarleg for grav eller festar har plikt til å halda gravminnet sikra og i forsvarleg stand.

Ansvarleg for grav eller festar kan inngå avtale om at kyrkjeleg fellesråd og den som vert gitt løyve til det etter §10, kan utføra planting og stell av grav.

Ein slik avtale fritenk ikkje den ansvarlege eller festar for ansvar vedkommande har etter dei til ei kvar tid gjeldande reglar.

§ 9 Bårerom, kyrkje

Kyrkjeleg fellesråd disponerer bårerom. Slike rom skal berre nyttast til å ta vare på døde i tida fram til gravferda. Ingen har tilgjenge utan etter løyve. Syning av den døde kan berre gjerast etter samtykkje frå den som syter for gravferda og vedkjem ikkje dei tilsette.

§10 Næringsverksemd

Næringsdrivande som ynskjer å driva verksemd på gravplassane skal innhenta løyve frå kyrkjeleg fellesråd. Løyvet kan kallast tilbake ved brot på vilkåra. Slik verksemd kan berre omfatta montering og vedlikehald av gravminne, og planting og stell av graver.

§11 Arbeid på gravplassane

Anleggs- og vedlikehaldsarbeid skal gå føre seg kvardagar i arbeidstida og må ikkje gå føre seg på søndagar, heilagdagane eller offentlege høgtidsdagane. Ikkje noko arbeid på gravplassen må vera til sjenanse for seremoniar eller rituelle handlingar på gravplassen eller bygning på gravplassen. Næringsdrivande kan berre køyra på gravplassen i den grad det er naudsynt for å utføra arbeidet. Slik køyring skal gå føre seg ekstra omsynsfullt.

§12 Brot på vedtektene

Dersom vedtektene ikkje vert haldne, kan kyrkjeleg fellesråd setja i verk naudsynte tiltak for ansvarleg / festar si rekning.